

Ei weesche de Kuldur

Habbderr in de letzt Zeit schunn emol vorm Bohnhof gestonne unn habbt eich dort den dreiseidische Schaukassde vunn de Stadt Flerschem oogeguggd. Ja? Unn, was habderr geseh? Nix habbderr geseh! Koo oo Plakat iss droi, koo oo Plakat, su wie se noch im ersde Halbjohr droigehonge hawwe. weil nix duts gewwe mett Kuldur in Flerschem, alles nitt vorgeseh, nix gibts, ess iss koo Geld doo!

Unn habbderr aach gemerkt, dasses ferrs zweide Halbjohr koon städtische „tipp“ gewwe hott, dess wär die Nummer 52 gewese unn isch denk, dess iss dess erste Mol in 26 John, wo ess den nitt gewwe hott. De tipp iss aach immer voll gewese mett Oogebote ferr Verostalldunge ferr e halb Johr, mett Termine ferr Große unn Kloone, ferr Alde unn Junge, ferr Kinner unn Erwachsene, ferr Flerschemer unn Oigeplaggde. Koon tipp, was soll merr aach enn tipp mache, wennis koo Verostallldunge gewwe dut!

Wissderr, in moim Alder hott merr sich joo oogewehnd, alles wasses mett de Stadt Flerschem su gewwe dut unn was oom nitt basst, ze entschuldische. Unn su isses aach medde Kuldur, ess iss halt koo Geld doo unn donn iss nix ze mache.

Werklich nitt?

Weil donn sitzt merr dehoom, guggt in die Zeidung und dut feststelle, ferr was su alles in Stadt unn Lond enn Haufe Geld ausgewwe werdd, unn merr frächt sich, iss vunn all dem Geld nitt ebbes abzezweische, vumm Kreis, vumm Lond odder vunn de Republik?

Gut, isch due joo oonumme, dass unser Verontwortliche in de Stadt doodenooch gesucht, awwer nix gefunne hawwe, unn trotzdem kann isch nitt verstieh, dass, wenn die Stadt koo Geld ferr Kuldur iwwerisch hott, koon onnern oispringe dut. Weil grad dess, was aach Flerschemer Kuldur ausmähd, deet joo dezu beidraache, die Oigeblaggde e bissi näher mett uns ahle Flerschemer in Verbindung ze brenge.

Unn widder heer isch, ei die wolle dess joo gar nitt: die wohne hier, schloofe hier, gieh moins fort unn kumme owends widder - unn wennse doch fortgieh, gieh se nooch Wicker in die Straußwertschaffd odder in die Flerschemer Wertschaffde unn donn widder nix wie hoom, weilse wohne, schloofe, uffstieh, schaffe unn widder nooch Flerschem ferrs Schloofe zurigg kumme. Unn sunndaachs fahrn se nooch Fronkfort odder in de Rhoigau, die wolle vunn Flerschem sunnst nix wisse.

Werklich nitt?

Awwer wenn merr dene doch nix oobiede dut?

Ihr Leit, gieht emol onn de Bohnhof unn guggt eich de Schaukassde oo, unn donn werdderr die sellwe Gedonke krieg wie aach isch.

Eiern Honnes